

大清仁宗睿皇帝實錄

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之七十四

監修總裁官經筵日講起居注官太子太傅武英殿大學士文淵閣領閣事稽察欽奉 上諭事件處管理工部事務翰林院掌院學

士隨帶^{加一級}年常^{加四級}_臣曹振鏞總裁官太子太保文淵閣大學士管理刑部事務^{加五級}_臣戴均元經筵日講起居注官太子少保內大臣文淵

閣提舉閣事稽察欽奉 上諭事件處協辦大學士戶部尚書翰林院掌院學士教習庶吉士總管內務府大臣欽黃旗滿洲都統步軍統領

管理戶部庫本宸苑清漪園等處總理工程處御膳房御藥房太醫院西洋堂事務軍器^{加二級}隨帶^{加二級}尋常^{加十三級}紀錄^{三十一}

次_臣英和經筵講官太子太保禮部尚書上書房行走武英殿總裁管理國子監事務^{加六級}隨帶^{加二級}紀錄^{四次}_臣汪廷珍等奉

敕修

嘉慶五年庚申九月庚辰朔命鑲紅旗漢軍

都統豐紳濟倫在紫禁城內騎馬○緩徵陝
西咸寧長安三原藍田醴泉臨潼涇陽興平
咸陽蒲城安康紫陽平利洵陽乾武功孝義
寧陝渭南高陵耀同官大荔華白水郃陽澄
城鳳翔扶風郿褒城略陽留壩鳳漢陰石泉
鎮安商南三十八廳州縣旱災本年額賦鹽
課並新舊常社倉應還籽種○撥山西藩庫
銀三十五萬兩解往陝西備賑○辛巳密諭
大德楞泰朕聞成都協領努和楞雖出師三載

均在開縣等處防守。並未隨營打仗。前次請
賞花翎。是何處立功殺賊。應明白回奏。再知
縣喻曰。泗係本年三月始行調赴隨營承辦
者。皆往來書啟。何故即請超升同知。若皆似
此瞻徇濫舉。則有囑託者平步升天。真出力
者反遭淹滯。賞罰不明。非為將之道。因汝常
立功勲。不肯直書諭旨申飭。此後當知改悔。
切實保薦。若稍徇私前功。可惜。勉之慎之。五
年以來。軍營積弊。朕實深知。因汝屢次立功。

安民除賊雖小有不妥之處。皆付之不論。非不知也。汝但勉力奮勇成功。朕必破格酬賞。成功速則賞重。不可不奮力也。今春汝實可嘉許。立功殺賊。自夏秋以來。甚不出力。今次奏摺。全不成話。忽東一句。西一句。總不明白。朕日夜焦急。盼一摺來看。今看此摺。實令心灰氣塞。今冬成功。汝定蒙厚恩。若仍前取巧推諉。朕肯一下。汝即性命不保矣。朕能誅和坤。不能誅德楞泰耶。因汝從前出力。故密寫。

此諭先行示汝知之。信與不信憑汝。此後亦不復再諭矣。○壬午。

上啟鑒恭謁

東陵。○命蹕路經過州縣額賦已節次蠲免十分之八者。此次全行蠲免。○是日駐蹕烟郊。

景行宮。○癸未遣官祭

歷代帝王廟。○是日駐蹕白澗行宮。○甲申。

駐蹕隆福寺行宮。○乙酉。

上恭謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

寶城前行禮躬奠哀慟隨恭謁

裕陵行禮讀文祭告哀慟深切王以下文武大

臣官員均隨行禮○是日迴鑾駐蹕桃花寺

行宮○丙戌諭內閣吉慶奏升任山東青州

府知府李戴春前曾奏明留辦洋匪投首事
件。今因洋匪投誠者漸少。請令該守速赴山
東新任等語。向來各省人員有升任他省者。
各該督撫往往奏留。不令即赴新任。此內如
遇用兵省分。該員有承辦軍務要件。或未便
遽易生手。事尚可行。其尋常無事省分。安得
援照此例。若云為地方需人起見。殊不思該
員升任省分。其員缺轉至懸宕。又需委員署
理。於地方公事不無貽誤。儻督撫等以該員

實係熟悉風土民情。為該省必不可少之員。不妨專摺奏明。候旨酌量對調。何必率請暫留。除李戴春令其速赴新任外。嗣後各督撫於該省升任人員。不得輒行奏留。違者將該督撫交部議處。將此通諭知之。○是日。駐蹕白澗行宮。○丁亥。諭內閣。勒保奏現當軍務未竣。所有四川委署各缺。除知府以上。仍應循例具奏。其餘委署正佐各缺。照向例按季咨部等語。川省現當辦理軍務之際。與他省

情形不同。所有委署正佐各缺。准其按季咨部。俟軍務告竣後。仍將調署州縣各缺。隨時具摺陳奏。以符定例。○以貴州勦辦青苗功。道員呂雲棟等。下部議敘。賞把總劉成業等。藍翎義首舉人高廷瑤等。頂帶。○德楞泰等奏。川省軍務出力人員。知州劉佳琦等。升賞有差。○賑江西寧都。雩都。廣昌。南豐。四州縣。被水災民。并蠲緩額賦有差。緩徵石城。瑞金。南城。永豐。吉水。豐城。南昌。新建。八縣。水災額。

賦○緩徵河南武陟孟二縣被水村莊新舊額賦及應還倉穀○是日駐蹕烟郊行宮○

戊子

上還宮○貸山西朔州被雹村莊籽種口糧並

緩徵本年額賦○庚寅

上御懋勤殿勾到奉天浙江情實罪犯停決奉

天斬犯九人浙江斬犯十人絞犯二人餘一

百十一人予勾○諭軍機大臣等姜晟奏湖

北各處雇募鄉勇隨時覈減情形總不免存

惜費之見鄉勇一項固須覈實辦理但勦辦賊匪必先能堵而後能勦果能於邊防各卡隘督飭兵勇實力堵禦使各股竄匪無從奔逸得以迅掃賊氛即需費稍多而於勦捕大有裨益儻任意刪減則防堵不嚴勦辦稽時轉致勞師糜餉姜晟惟當擇其素不得力之鄉勇量加裁汰其餘各要隘處所仍須嚴密布置分飭防守俾帶兵之員得以痛加勦殺此為最要將此諭令知之○兩江總督費淳

南河河道總督吳璥奏報秋汛安瀾得旨嘉
獎賞費淳花翎與吳璥下部優敘○辛卯諭
內閣書麟奏請將黔省總兵以下照浙江之
例交貴州巡撫節制一摺所見甚是黔省地
控苗疆界連川楚兵防最關緊要雲貴總督
駐劄雲南離黔省較遠其貴州營伍不能時
加校閱而鎮將平日訓練之勤惰亦恐耳目
難周自應令貴州巡撫就近考覈俾資整飭
嗣後黔省總兵以下均著巡撫節制所有各

鎮協營官兵責成該撫隨時校閱如有怠玩廢弛即知會總督分別叅革著為令○又諭昨據謝啟昆奏請揀發同知二員通判二員知州二員知縣八員前赴廣西差委一摺已派大臣揀選矣但近來各省奏請揀發人員內惟四川陝甘湖北等省現在軍務未竣需員較多自應照所請人數發往其餘各省紛紛奏請部中候補候選正途人員現在不敷揀發若以捐納人員充數則素未諳悉吏治

恐於地方公事無益。此後無事省分。奏請揀發人員。若部中候補人多。仍照所請發往。若人數不敷。吏部奏明。照所請之數減半發往。所有現在廣西省揀發各項人員。即減半發往。○又諭劉權之奏。保舉黎誕登不實。請交都察院嚴加議處。一摺。黎誕登於劉權之保奏後。朕曾降旨詢問費淳等。該員平日居官聲名如何。該督撫亦經保奏。並奏請升署太倉州知州。至黎誕登在任虛博聲名。自敘實

政令紳衿等具呈勒石等事。該督撫等近在省城尚未深知。况劉權之祇係在學政任內接見數次。其官聲得自傳聞。焉能究悉底裏。若因其採訪未確。即加以嚴議。恐將來大臣等心存顧慮。不肯舉薦人才。但竟置之不議。又恐開濫保之端。除黎誕登俟該督等審明奏到。再行覈辦外。劉權之著加恩改為交都察院議處。○命五城於冬春二季設廠煮賑。

○壬辰遣官祭

都城隍之神○癸巳。

上御懋勤殿勾到陝甘情實罪犯停決官犯一人斬犯十二人絞犯四人餘八十一人予勾○諭內閣本年順天鄉試尚書朱珪之孫朱涂入場應考未經中式因將伊硃墨卷取閱其制藝詩策俱屬平平原難入選同考官未經呈薦而主考亦未搜錄校閱本為公當但念朱珪前在上書房行走曾授朕詩文且數歷有年恪共厥職現在伊孫祇有朱涂一人